

Transferentzien Batzordeak onartu ditu INEMi eta Justiziari buruzko akordioak

Hala ere, guztiek UPNko gobernuaren negoziazio «kaskarra» kritikatu dute

Juan Kruz Lakasta / Iruñea

Transferentzien Batzordeak onartu egin zituen atzo Iruñeko eta Madrilgo gobernuak INEMen politika aktiboak eta Justiziako transferentziak egiteko hitzartutako akordioak. Hala ere, oposizioko taldeetako ordezkariak kritikatu egin zituzten akordioak, eta UPNko gobernuak negoziazio kaskarra egin duela nabarmendu zuten.

ESPAÑIAKO Administrazio Publikoetarako ministro Angel Acebes Iruñera etorriko da hilaren 27an, Estatuaren ize-nean INEMen politika aktiboen eta Justiziaren transferentzien inguruko akordioak sinatzeko. Izan ere, Iruñeko eta Madrilgo gobernuak hitzartutako akordioak Nafarroako Parlamentuko talde gehienek oniritzia jaso zuen atzo. Nolanahi ere, talde guztiek ez zuten bozkatu akordioaren alde. Izan ere, HB birritan abstenitu zen, eta EA behin.

INEMi dagokionez, Nafarroako Gobernuak 2.300 milioi pezeta jasoko ditu politika aktiboekin batera (92 milioi libera inguru). Haietatik 1.200 milioi, Iruñeak Estatuak ordaintzen dizkion transferentzien bitartez jasoko ditu. Gainontzekoak Nafarroak Estatuari ordaintzen diru kopurutik kenduko dute. Akordioak dio Iruñeak aurrerantzean INEMen politika eragileak «kudeatuko» dituela. «Kudeatu eta antolatuko» dituela esatea proposa-



M.H DE LEON / EFE

Angel Acebes Espainiako Administrazio Publikoetarako ministroa, Miguel Sanz Nafarroako presidentearekin, INEMen transferentziei buruz apirilaren 8an izandako bileran.

tu zuen HBk. Ez zuten onartu proposamena, eta, horrenbestez, HB eta EA abstenitu egin ziren bozketa egiterakoan. Talde guztiek salatu zuten negoziazioa gaizki egin dela. IUK esan zuen baldintzak «nabarmen» hobe zitezkeela, eta negoziaketa nahita luzatu zela. EAK ildo beretik jo zuen, eta PSNk luzamenduaren giblean hauteskundeekin lotutako interesak daudela gaineratu zuen.

Justizian, soldatak parekatu gabe

Justiziari dagokionez, Estatuak 600 milioi pezeta

ordainduko dizkio Nafarroari (24 milioi libera). Horren truke, Nafarroako Administrazioak 300 langile hartuko ditu bere gain, bai eta Foru Erkidegoko Justizia egoitzen ardura ere. Dena dela, Justiziako langileen egoera berezia izanen da; izan ere, akordioak zehazten du Foru Gobernuak ordainduko badie ere, Estatuako langileak izaten segituko dutela. Estatuak ezarri du zehaztapena, eta haren xedea langileen soldata Foru Administrazioako langileen soldatarekin parekatzerik ez egotea da. HBk zehaztapena kentzeko eskatu zuen. Proposamenari botoa

ematerakoan talde guztiak abstenitu ziren, eta UPNk kontra bozkatu zuen. Erregionalistek boto gehiago dutenez, proposamena atzera bota zuten, eta HB abstenitu egin zen akordioaren bozketan.

Burguetek hautetsien lana goretzi du udal berrien 20. urteurrenean

■ Udal politikak poz baino atsekabe gehiago ekartzen duela dio

Erredakzioa/Iruñea

NAFARROAKO Udal eta Kontzejuen Federazioko lehendakari Jose Andres Burguetek Nafarroako 3.000tik gora alkate eta zinegotzien lana goraipatu zuen, diktadura osteko udalen 20 urteurrena ospatzeko ekitaldietan. Burgueteren esanetan, udalgintzak «sakrifizio nabarmenak exijitzen ditu, poz baino atsekabe gehiago ematen du».

Astelehenean 20 urte beteko dira udal korporazio berriak osatu zirenetik. NUKFko lehendakariak nabarmendu zuen udaltan gobernu demokratikoak izateak lagundu egin duela «egun dauzkagun ongizate mailak lortzen». Goizeko ekitaldian UPNko Rosa Lopez senadoreak eta PSNko Carlos Chivite diputatuak ez ezik udalen federazioko orain eta lehengo zuzendaritzetako kideak izan ziren. Tomas Caballero UPNko zinegotzia ere izan zuten gogoan.

HBk ez du arrazoirik ikusten Bilboko Udalaren 20 urteko jarduna ospatzeko

■ Franco hil osteko udalen eraketa gogoratuko du Udalak ekitaldi batean

Iñaki Uriarte/Bilbo

BILBOKO UDALAK harrera egingo du udaletxean hurrengo astelehenean Francoren diktadura ostean sortu ziren udal demokratikoen eraketa ospatzeko. Xede berarekin 1799-1999 bitartean udal agintariak izan zirenen erakusketa izango da Bidebarrietako liburutegian.

HBko hiru belaunaldietako zinegotziek ospakizunetara-

ko arrazoirik ez dagoela nabarmendu zuten. Ibon Arbulu zinegotziak azaldu zuen egun Euskal Herrian ezer ospatzeko badago ez dela udalen 20 urteko jardueraren, «Euskal Herriko gehiengo politiko, sindikal eta sozialak fase hau amaitutzat jo eta marko demokratikoetara jotzeko apustua egin duelako». Arbuluk gogoan izan zituen duela 20 urte alkateorde izan zen Santi Brouard, eta baita egun kar-

tzelan dauden Tasio Erkizia, Carlos Rodriguez, Koldo Celestino eta Sebas Prieto zinegotzi ohiak ere.

Josu Barandikak udalen legea gaitzetsi zuen, hainbat alderdiren ekarpen politikoa baztertzen duelako. Lander Etxebarriak, berriz, Armada laguntzeko bulegoaren desagerpena, euskalduntze plangintzaren garapena eta herriarren parte hartzearen aldeko apustua egin zuen.